



S E P T I E M E

S E R M O N

S V R L E L I I I . C H A -

P I T R E D V P R O -

p h e t e E s a i e .

V E R S E T V I I I .

il a esté enleué de la force de l'angoisse & de la condamnation.



O i c t c o m m e p a r l e
l'Apostre au cinqui-
me de l'Epistre aux
Romains, Si, dit-il,
lors que nous estions
ennemis nous auons
esté recôciliés à Dieu
par la mort de son
Fils; beaucoup plus estans desia reconciliez,
serons nous sauuez par la vie d'icelui. Le
sens de ce passage est tel, Si Christ a fait
pour nous ce qu'il s'ebloit deuoir le moins,
beaucoup plustost fera-il ce qu'il semble de-
uoir le plus. Or sembloit-il moins deuoit

mourir pour ses ennemis , veu qu'à grand peine auient il que quelcun meure pour son ami. Il sembloit aussi moins nous deuoir iustifier par sa mort, & par icelle nous reconcilier à Dieu, veu qu'il n'y e rien de plus infirme que la mort. Cependant il a fait l'un & l'autre: Beaucoup plustost donc nous sauuera il par sa vie. Autresfois nous estions ses ennemis, maintenant ses amis: Et s'il a peu alors pour nous quelque chose par sa mort , que ne pourra-il maintenant pour nous par sa vie?

De là resulte cette verité , Assauoir que si l'Eglise de Dieu peut recueillir du fruit de l'aneantissement du Fils de Dieu , signifié par sa mort : beaucoup plus de son exaltation ici designee par sa vie.

Et c'est le suiet du discours auquel nous conduit maintenant nostre Prophete: car si lors qu'és versets precedens il nous a parlé de l'aneantissement de Iesus Christ , il nous a obligez de vous deduire plusieurs excellens vsages qui nous reuiennent de l'origine contemptible de Iesus Christ, de sa vie pleine d'opprobre , & de sa mort ignominieuse: Combien plus maintenât, puis qu'il nous parle de ce mesme Iesus Christ , qui a esté enleué de la force de l'angoisse & de la condamnation; qui est resuscité victorieux de la mort; qui est monté aux cieux triomphant

phant de tous les ennemis ; qui glorieux & regnât à tousiours est assis à la dextre de son Pere. Combien plus, di-ie, sommes nous obligez de rapporter à nostre v'sage toute cette exaltation du Fils de Dieu ? A cela faut-il qu'avec la conduite & assistance de l'Esprit de Dieu nous nous y employions dès à present. Lui mesme vueille que ce soit à sa gloire & à nostre salut.

L'exhortation precedente fut employee à examiner les paroles du Prophete, & simplement à en donner le sens, à cause qu'elles contiennent plusieurs façons de parler assez obscures & difficiles. Ainsi sur ce texte nous fîmes voir, que par l'angoisse il falloit entendre toute l'affliction qu'apporterent à Iesus Christ tant les Iuifs que les Gentils. Et sous la Condamnation, nous comprîmes aussi le iugemēt de Dieu qui pour nous absoudre deuant son throne celeste, a voulu que son Fils fust condamné deuant le tribunal terrien. Qui plus est, nous remarquâmes que le Prophete parle specialement de la force de l'angoisse, pour nous tesmoigner que son agonie a esté extreme. De tout cela il nous a dit que Christ en a esté enleué, pource qu'il est sorti victorieux & des souffrances & de la mort qu'il a soufferte y ayant esté condamné en iugement. Et c'est ce que nous dit l'Apostre au cinquieme de l'Epi-

estre aux Hebreux, que Christ es iours de sa chair ayant offert, avec grand cri & larmes, prieres & supplications à celui qui le pouuoit sauuer de mort a esté exaucé de ce qu'il craignoit. Plus clairement ençor S. Pierre, au deuxieme des Actes, quand il dit que Dieu a ressusité son Fils, ayant deslié les douleurs de la mort, pourtant qu'il n'estoit possible qu'il fust retenu d'icelle.

Voila quel est le sens des paroles que nous auons leues, Elles nous descriuent l'*Exaltation* du Fils de Dieu. Et nous auons ci dessus promis qu'au second poinct nous en remarquerions l'ysage. Car n'estimons point que la parole de Dieu, & sur tout la doctrine de l'Euangile, nous soit proposée simplement comme vne histoire, pour nous rendre plus sçauans ou bien informés des choses passées. Si ainsi estoit, quel seroit nostre avantage par dessus les Diables, qui n'ignorent rien de toutes ces choses, & qui en general pour leur grand sçauoir sont appelez *Demons*, comme qui diroit Sçauans.

Il y a bien plus. Car il n'en prend pas de la verité que nous traitons comme de certaines receptes qui ne font ne bien ne mal à ceux qui en vsent. Cette doctrine fait necessairement bien ou mal à ceux qui la cognoissent. Elle a son operation à mort contre les Reprouvés, à vie pour les Esleus. Les

Diabls sçauent ces choses: ils les croient: mais ils en tremblent. Et elles sont salutaires à tous ceux qui en remarquent les vsages pour les appliquer à leur instruction & consolation.

Et afin que nous soyons de ce nombre, Voyons à quelles fins est auenue cette Exaltation de Iesus Christ, & quelle vtilité nous reuiet de ce qu'il a esté enléué de la force de l'angoisse & de la condamnation.

En si peu de temps nous ne le pouuons faire que sommairement & en general. Et de fait il n'y a en toute l'Escripture matiere aucune plus ample que celle ci. Car puis que l'Exaltation du Fils de Dieu monte de son aneantissement à son feiste par trois degrez qui sont sa Resurrection, son Ascension au ciel, & son Assiete à la dextre du Pere, il n'y a nulle doute que qui voudroit traiter spécialement cette doctrine, n'y peult rapporter tout ce que dit l'Escripture de ces trois articles de nostre foy.

Mais puis que nostre Prophete s'est contenté de dire en general que Christ a esté enléué, il nous suffira sur ses paroles de ne parler avec lui que generale ment & sommairement, tant des fins que des fruiets de cette Exaltation.

Et pour commencer par les fins l'Escripture nous apprend que Christ a esté enléué de

son ignominie en sa gloire: afin que fussent accomplies toutes les figures & predictions des Prophetes. Autrement que deuiendroit la verité de nostre texte. Et comment seroit veritable ce que Iesus Christ dit au douzieme de S. Matthieu, touchant Ionas figure d'icelui par son seiour au ventre de la balaine & sortie hors d'icelle. Au contraire, quand l'Eglise void l'accomplissement entier de toutes ces choses predites de si long temps, & qui toutes se trouuent veritables en vn seul Iesus Christ, elle conclud aisément & qu'il n'y a que lui qui soit le vray Messias: & qu'il n'y a que Dieu qui puisse estre auteur d'une parole, laquelle non moins certainement que de long temps, nous a exactement predict toutes ces choses.

Cette exaltation est aussi aduenue, afin que le Fils de Dieu fust déclaré le Prince de vie. Par la resurrection des morts il a esté pleinement déclaré Fils de Dieu en puissance, disoit l'Apostre au premier de l'Epistre aux Romains. En la mort de Christ Dieu a combattu contre le diable; la iustice avec le peché; la vie mesme avec la mort. Et sa resurrection a esté vn tesmoignage assuré de sa pleine victoire. Aussi a-il enleué au ciel pour triompher de ses ennemis. N'estant point raisonnable, que le Prince de gloire & de vie, & auquel de droict appartient le

royaume celeste, fust plus long temps retenu en terre. Il a falu que pour lui fust verifié ce que commande le Prophete au Pseume vingtquatrieme. Portes, esleuez vos lintreaux: & vous, huis eternels, haussez vous, & le Roy de gloire entrera: Et le Pere qui exauce tousiours son Fils, ne lui eust-il point accordé ce qu'il lui demande au dixseptieme de S. Ican, Maintenant glorifie moi, toi Pere, enuers toi mesme, de la gloire, laquelle i'ay eüe par deuers toi deuant que le monde fust fait? Ne falloit-il point aussi & que tout genouil ployast deuant lui, & que toute langue confessast qu'il est le Seigneur à la gloire du Pere? Les idolatres n'ont point creu pouuoir trouuer assez d'hyperboles, assez de façons de parler excessiues, pour exalter leurs Saints. Mais toi, ô fidele, que ta consolation soit de ne pouuoir non exprimer, mais assez dignement comprendre, le degré de gloire auquel de la force de l'angoisse a esté esleué ton Sauueur? A ceci rapporte tout ce que dit Daniel au septieme chapitre, de la seigneurie & des royaumes qui deuoyent estre donnez à Iesus Christ: Car il a esté enleué afin d'en prendre possession. C'est de lui, & à ce propos, que Michee disoit au chapitre quatrieme: L'Eternel regnera en la montagne de Sion, dès ceste heure iusques à tousiours. Ce sont à peu

prés les termes de l'Ange à la Vierge au premier de S. Luc : Il regnera sur la maison de Jacob eternellement , & n'y aura nulle fin à son regne.

Et quand nous disons que cette exaltatiō est auenue à la gloire du Fils, c'est non pour en exclurre , mais pour y comprendre aussi la gloire du Pere : car outre ce qu'en general rien n'arriue dont Dieu ne tire sa gloire , puis que mesme la lumiere des tenebres & la vie de la mort : l'Escripture rapporte aussi formellement l'exaltation du Fils à la gloire du Pere. C'est ce que dit l'Apostre au fixieme de l'Epistre aux Romains , que Christ est ressuscité des morts, par la gloire du Pere. Aussi pourquoi l'Escripture si souvent nous reitereroit elle que c'est le Pere qui a ressuscité son Fils des morts, si ce n'est afin que de celle ci, comme de toutes ses œuvres la gloire luy en soit rendue ? Outre ce qu'il n'en prend pas du Pere , au regard de son Fils, comme des rois, qui venās sur l'aage sont souvent ialoux de ce qu'on adore le Soleil levant, comme on parle, c'est à dire de l'honneur qu'on rend à leurs successeurs. La gloire randue au Fils ne diminue en rien celle du Pere : car le Pere & le Fils sont vn. Qui honore le Fils, il honore le Pere , & pourtant aussi , comme nous l'auons allegué, Iesus Christ demandoit à son Pere la gloi-

gloire qu'il auoit eüe par deuers lui deuant que le monde fust fait : c'est à dire la gloire qu'il a de toute eternité commune avec le Pere. Il est raisonnable que l'ombre suiue le corps, que la figure cede à la verité, que le flambeau de la nuit face place à la venue du Soleil. Et Iean Baptiste, precursor de Iesus Christ parlant d'icelui, auoit raison de dire, Il faut qu'il croisse, & que ie soye amoindri: mais il n'y a rien de semblable entre les personnes de la sainte & incomprehenfible Trinité. L'une ne croist point à l'amoindrissement de l'autre. En Dieu il n'y a ni ombre ni figure: Tout y est Soleil & verité, de sorte que l'exaltation qui d'une façon speciale conuient au Fils, lequel auoit esté ignominieusement aneanti, tourne aussi à la manifestation de la gloire de son Pere.

¶ Aussi Christ a esté enleué en gloire & à vie eternelle, afin qu'en lui eust son plein accomplissement cette clause formelle de l'alliance legale, ou des œuvres contenue au dixhuitieme du Leuitique & ailleurs, *Fais ces choses & tu viuras*. Car l'alliance de la Loy promet generalement gloire & vie eternelle à quiconque accomplira les statuts & ordonnances de l'Eternel. Et qui les a mieux accomplies que Iesus Christ? Mais qui ne les a outrepassees, excepté Iesus Christ? qui a esté tenté de mesme que nous en toutes

choses, hors mis peché.

Et ceci est notable sur la question qu'on fait. Si nul ne parvient à la vie éternelle par ses œuvres? Nous respondons que non. Non qu'il y ait ou impuissance en la Loy, ou défaut en la verité des promesses de Dieu. Mais pource que tout homme est pecheur & corrompu. Donc ce qui estoit vray en la these, au regard de la promesse de Dieu; Assavoir que tout homme peut auoir la vie éternelle par ses œuvres, se trouue entièrement defectueux en l'hypothese, à cause de l'impuissance & iniquité de tous les hommes. De là il auient, puis que qui faut en vn seul poinct est coupable de tous : & puis que qui est coupable ne peut estre moins puni que de la malediction éternelle; il aduiuent, di-ie, que les promesses legales venans à nous manquer par nostre faute, Dieu par sa pure misericorde substitue en leur place les promesses Euangeliques, afin de donner à nostre foy en son Fils la gloire & vie éternelle que la Loy accordoit à nos œuvres par cette promesse, Fay ces choses & tu viuras. Promesse qui a esté verifiée en l'exaltation de Iesus Christ.

Adioultons encor que de la force de l'angoisse Christ a esté enleué en sa merueilleuse gloire, afin qu'ayant englouti la mort & vaincu nos ennemis à plein, il nous com-

inuniquast & nous appliquast tous ses benefices. Et ceci nous porte à la consideration de l'autre poinct.

Ayans donc monstré en general quelles sont les fins principales de l'exaltation du Fils de Dieu, esleué en gloire; afin que les figures & Propheties fussent accomplies: afin que le prince de vie entraist en la gloire qui lui estoit deüe; afin que la gloire du Pere en fust d'autant plus manifestee: afin que cette promesse legale, Fay ces choses & tu viuras sortist son plein & entier effect: bref afin qu'il nous peust pleinement communiquer & appliquer ses benefices: voyons maintenât quels sont ces benefices ou ces fruiçts de l'exaltation de Iesus Christ.

Pour en parler distinctement, nous disons que de l'exaltation du Fils de Dieu nous naissent *trois Fruiçts principaux*. la Iustification, la Sanctification, & la Glorification.

Pour la *Iustification*, Le premier fruiçt qui nous reuient de ce que Christ a esté esleué en gloire, c'est la iustice par laquelle nous sommes trouuez iustes deuant Dieu: & d'où nous naist cette vniue conuolation en la vie & en la mort, assez forte pour esteindre tous les dards enflammez du Malin, & pour surmonter toutes tentations: Voici quelle est ceste conuolation: C'est que Christ ayant accompli le sacrifice de sa mort, a aussi plei-

nement satisfait pour nous en telle sorte que pleinement quittes de nos debtes; nous pouuons comparoistre deuant Dieu; comme si nous n'auions iamais forfait contre lui. Et pour preuue de ce plein payement nous auons l'exaltation de Iesus Christ.

Ce n'est pas qu'il faille estimer que la resurrection ou l'ascension, ou l'assiette de Christ à la dextre de Dieu, qui sont les degrez de son Exaltation, soyent aussi les parties du prix de nostre redemption. Christ en a en sa mort pleinement acheué le payement. Telsinoin qu'en rendant l'esprit, il a dit, que tout estoit accompli. Mais ce neantmoins la resurrection & les autres degrez de sa gloire nous sont vne preuue, vn telmoignage tres certain qu'il a tout accompli pour nous: & est veritable ce que dit l'Apostre au quinzieme de la premiere aux Corinthiens, Si Christ n'est point ressuscite, vostre foy est vaine, vous estes encor en vos pechez. Et de fait si Christ fust demeuré en la mort, la mort seroit du tout sans efficace; il ne nous en auroit pas deliurez: mais il auroit esté surmonté par icelle. Or il fust demeuré en la mort si seulement vn de nos pechez fust demeuré sans estre effacé. Car l'Apostre au sixieme des Romains parle en general & sans rien excepter, quand il dit que les gages du peché, c'est la mort. Et la iustice de Dieu est

est tellement seuer & exacte, qu'elle ne permettroit iamais, comme parle Iesus Christ, au cinquieme de S. Matthieu, qu'un iota, ou un seul poinct de la Loy passast, ou ne fust accompli. Puis donc que Iesus Christ est sorti de cette prison, à laquelle il auoit esté condamné par sentence Diuine; & puis que (comme parle saint Luc au huitieme des Actes, traduisant ce passage) son iugement a esté enleué, qui ne void qu'il faut qu'il ait payé iusqu'au dernier quadrin, & entierement effacé l'obligation qui estoit contre nous: de sorte qu'il ne peut plus y auoir de condamnation à ceux qui sont en lui. Et la preuue que Christ nous donne par sa sortie du sepulchre, nous naist aussi de son entree au ciel, assauoir qu'il nous a acquis vne pleine iustification. Car comme sous la Loy le Souuerain Sacrificateur figure de Iesus Christ, n'entroit point sans sang au Sanctuaire, figure du ciel: Aussi Christ n'est point entré au ciel qu'il n'eust auparauant pleinement satisfait pour tous nos pechez, par l'effusion de son sang.

Et c'est ainsi que nous prenons les degrés de l'exaltation de Iesus Christ, pour autant de preuues infailibles de son entiere satisfaction pour toutes nos offenses. C'est en ce sens qu'il faut prendre ce que dit l'Apostre au quatrieme des Romains. Christ, dis-

il, a esté liuré pour nos offenses, & est ressus-
cité pour nostre iustification. Comme s'il
disoit que Iesus Christ non seulement est
mort pour nous acquerir iustice : mais qui
plus est a voulu que sa resurrection nous en
soit vn gage tref-assuré. En ce sens l'Apo-
stre au huiétieme de la mesme Epistre, pour
monstrer que nul ne peut intenter accusa-
tion contre nous , il ne dit pas seulement
que Christ est celui qui est mort pour nous :
mais il adioute, Et qui plus est, qui est res-
suscité, lequel aussi est à la dextre de Dieu,
& qui fait mesme requeste pour nous. Et au
dixieme de la mesme Epistre, Si tu confesses
le Seigneur Iesus de ta bouche , & que tu
croyes en ton cœur que Dieu l'a ressus-
cité des morts, tu seras sauué. Par le contraire le
mesme Apostre nous a desia dit ailleurs, que
si Christ n'est point ressus-
cité, nous sommes
encor en nos pechez , comme s'il disoit, en-
cor obligez d'estre punis pour iceux.

O quelle Consolation reuiet au fidele,
d'estre assuré que Christ n'a point esté en-
leué en gloire, qu'il n'ait entierement effa-
cé nos pechez, qu'il ne nous ait pleinement
iustifiez? Consolation dont nous sentons
l'efficace en tout temps , si nous sommes
vrais fideles. Mais sur tout, lors que nous
sommes presse-
z du sentiment de nos pe-
chez, & que nous auons à combattre contre
l'hor-

l'horreur de la mort, contre l'apprehension des iugemens espouuantables de Dieu, & de sa malediction eternelle.

Il faut que tu m'auouës, qu'estant reduit en tel estat, rien ne te peut apporter vn plus vray soulagement que l'exaltation du Fils de Dieu, tesmoignage asséuré de la remission de tes pechez : donc de ta paix avec Dieu : donc que sa malediction n'est plus contre toi : donc que tu es deliuré de la mort eternelle.

Si cela est, ains, Puis que cela est, ne t'appliquerois-tu point ce que Iesus Christ dit à Marie, apres sa resurrection, Femme, pourquoi pleures-tu? Et aux autres femmes, Ne craignez point. Et à ses disciples, Pourquoi estes vous troublez?

Et certes il y a suiet non de pleurer, mais de s'esioir : non de craindre, mais de s'asseurer : non d'estre troublé, mais d'auoir tranquillité en sa conscience, quand on a l'exaltation de Iesus Christ pour preuue qu'il a effacé nos pechez, appaisé l'ire de Dieu, vaincu le Diable, englouti la mort, aboli les enfers. Tous ceux qui anciennement se trouuerent dans l'Arche, furent preseruez du deluge vniuersel, qui noya toute la terre: De mesme seront sauuez du deluge de leurs pechez, & des abysses de la mort, tous ceux qui pressent en leur conscience ex-

R

alteront par foy leur cœur à cette exaltation du Fils. A cela fait allusion l'Apostre saint Pierre au troisieme de sa premiere, quand il monstre qu'à cette deliurance, aueue par l'Arche, respond l'attestation de bonne conscience deuant Dieu par la resurrection de Iesus Christ, qui est à la dextre de Dieu estant allé au ciel : auquel sont assuiettis les Anges & Puissances & Vertus. Comme s'il disoit, L'attestation de bonne conscience ne nous est elle pas acquise, & ne pouuons-nous pas avec pleine conscience protester, voire en la presence de nostre Dieu, que nous ne craignons ni mort ni vie, ni Anges, ni Principautez, ni puissances, ni choses presentes, ni choses à venir, ni hauteur, ni profondeur, ni aucune autre creature? Pourquoi? Christ est ressuscité des morts: Il est à la dextre de Dieu: Il est allé au ciel, les Anges, les puissances, les vertus lui sont assuietties. Et comment cela s'il n'auoit pleinement satisfait pour nous?

Puis que ces choses sont telles, combien de suiet auons nous de nous escrier enuers vous; comme S. Paul enuers Timothee au second de sa seconde, Ayez souuenance que Iesus Christ est ressuscité des morts. Et avec nostre Prophete, qu'il a esté enleué de la force de l'angoisse & de la condamnation.

L'autre fruiet de l'exaltation de Iesus Christ,

Christ, c'est *nostre Sanctification*. Article auquel le fidele ne doit pas moins prendre garde qu'au precedent. Christ par son exaltation nous apprend, ains nous donne de ne viure plus à peché, mais à Dieu. Doctrine d'vsage qui peut estre recueilli de tous les degres de la gloire de Iesus Christ.

L'Apostre a recueilli ce fruit de la Resurrection d'icelui. Ainsi au sixieme de l'E-pistre aux Romains, Ne sçauiez vous pas, dit-il, que nous tous qui auons esté baptizez en Iesus Christ auons esté baptizez en sa mort? En ce verset l'Apostre a manifestement esgard aux deux parties de nostre repentance & regeneration, que l'Escripture appelle cesser de mal faire, & apprendre à bien faire: despouiller le vieil homme & reuestir le nouveau: mourir à peché & viure à iustice.

Et comme il deduit de la mort de Christ la premiere partie qu'il appelle Sepulture: aussi l'autre de sa resurrection, qu'il nomme cheminer en nouveauté de vie. Et son intention est de nous enseigner, que comme par foy nous sommes entez en Iesus Christ: aussi auons nous par nostre Baptisme tesmoignage de cette nostre vnion avec lui.

Que si nous sommes entés en lui, & qu'il y ait quelque voire vn tres-grand rapport entre les sarimens & leur iep, entre les bran-

ches & leur tronc ? Aussi faut il qu'il y ait communion entre nous & nostre Seigneur Iesus Christ. Communion, que nous devons tesmoigner en nostre mort, en nostre vie, en nostre perseuerance.

En nostre mort spirituelle, premiere partie de nostre regeneration : afin que comme Christ iuste pour les iniustes a souffert, a esté crucifié, est mort : Nous aussi souffrions contre nostre propre chair, crucifions nos meschantes affections & conuoitises, & finalement mourions entierement à peché.

En nostre vie spirituelle, qui est la seconde partie de nostre regeneration: afin que come ce que Christ est mort, il est mort pour vne fois à peché: & ce qu'il est viuant, il est viuant à Dieu : Nous aussi faisons ainsi nostre cõte, que nous sommes morts à peché, mais viuans à Dieu, en Iesus Christ nostre Seigneur. Puis il adioust, Que le peché donc ne regne point en vostre corps mortel, pour lui obeir en ses conuoitises. Et n'appliquez point vos membres pour estre instrumens d'iniquité à peché : mais appliquez vous à Dieu, comme de morts estans faits viuans, & vos membres pour estre instrumens de iustice à Dieu.

A ceci faut il ioindre vn fruit que l'Ecriture fait porter à la resurrection de Iesus Christ. C'est le don de son Saint Esprit, duquel

quel l'habitation en nous est, afin que nous cheminions en nouveauté de vie. C'est la consequence de l'Apostre au huietieme de l'Epistre aux Romains: Si, dit-il, l'Esprit de celui qui a ressuscité Iesus des morts habite en vous, celui qui a ressuscité Christ des morts viuifiera aussi vos corps mortels à cause de son Esprit habitant en vous. C'est ce qu'il dit ailleurs, que nous sommes ressuscitez ensemble en Iesus Christ. Item, que nous qui estions morts en nos fautes, Dieu nous a viuifiés ensemble avec Christ.

Reste la perseuerance, qui est l'accomplissement des deux parties de la regeneration, voire le couronnement d'icelle: afin que comme Iesus Christ ne meurt plus, iamaïs aussi il ne nous auiene de mourir en nos pechés: Ains continuons en la sanctification des enfans de Dieu, iusques au dernier soupir de nostre vie, tant qu'il plaise à Dieu que nous paruenions à la mesure de la parfaite stature de Christ.

Ce que nous disons de la resurrección du Fils de Dieu conuient aussi à son Ascension, & à son Assiete à la dextre de Dieu.

A son Ascension: Car n'est-ce point afin que nos affections ne soyent point engagees en la terre: que nos cœurs soyent esleuez au ciel, où est Iesus Christ nostre Chef, nostre thresor; le consommateur de nostre foy? As-

pirer ailleurs qu'à lui, c'est (entant qu'en toi est) desmembrer le corps d'icelui. Comme si le Chef pouuoit estre au ciel, & les membres croupir dans la boue de la terre; ou bien abysser au fond des enfers.

Et quant à son Affiete à la dextre du Pere, N'est-ce point afin qu'il exerce son empire aussi bien sur nous & en nous, que contre nos ennemis? Que si estant encor en forme de seruiteur, il a peu tanser la mer, & de sa voix appaiser la tempeste; Estant maintenant esleué en gloire, & ayant toute puissance au ciel & en terre: ne sera ce point comme pour froisser nos ennemis par sa verge de fer? aussi pour appaiser par sa parole les vents de nos conuoitises, & pour ranger par son Esprit le nostre à l'obeissance qui lui est due?

O fruit excellent de l'exaltation du Fils de Dieu! Auquel fruit l'Apostre selon sa coustume nous conuie, non seulement par sa doctrine, mais aussi par son exemple au troisieme de l'Epistre aux Philippiens, Il dit qu'il repoute toutes choses siente pour gagner Christ: pour estre trouué en lui, pour le cognoistre, & la vertu de sa resurrection, & la communion de ses afflictions, en estât rendu conforme à sa mort; Essayant si par aucune maniere ie puis paruenir à la resurrection des morts. Puis il adioust qu'il n'est

point

point rendu accompli, mais qu'il poursuit, pour tascher d'apprehéder: qu'il auance aux choses qui sont en auant, & tiré vers le but, assauoir au prix de la supernelle vocation de Dieu en Iesus Christ.

Et n'auancerions nous point aussi avec l'Apostre? Ne nous y efforcerions nous point? Nous le deuons: afin que sentans en nous quelques auancemens, quelques vrais accroissemens en nostre Sanctificatió, nous puissions dire avec l'Apostre au deuxieme de l'Epistre aux Galates: Je suis crucifié avec Christ, & vi, non point maintenant moi, mais Christ vit en moi: & ce que ie vi maintenant en la chair, ie vi en la foy du Fils de Dieu, qui m'a aimé, & qui s'est donné soi-mesme pour moi.

Et pour nous monstrier si avec verité nous pouuons vser du mesme langage, prenons en pour. marque l'exhortation qu'il nous fait au troisieme de l'Epistre aux Colossies, Si, dit-il, vous estes ressusцитеz avec Christ, cherchez les choses qui sont en haut, là où Christ est assis à la dextre de Dieu. Pensez aux choses qui sont en haut, non point à celles qui sont sur la terre. Marque excellente. Veux tu donc sçauoir, ains nous veux tu faire cognoistre que dès ce monde, tu as desia bonne part à la resurrection & à l'exaltation de Iesus Christ? Mortifie tes mem-

bres: pense aux choses qui sont en haut: laisse, abandonne de bon cœur toute la corruption qui est sur la terre , Si tu ne le fais, quoi que tu dies , tu n'es point ressuscité: ains tu es mort : Au mesme sens, que la vesue qui vit en delices est morte en viuant, comme le prononce l'Apostre au cinquieme de la premiere à Timothee , Que si tu es de ce nombre , en quelle misere es tu plongé? Quel môstre es tu en la maison de Dieu: C'est vne chose laide à voir & bien digne de commiseration , qu'un membre mort & pourri en vn corps viuant : mais n'est-ce point chose sans comparaison plus detestable , que de porter ton ame morte , infecte desia & puante dedans ton corps , qui iouit de la vie presente? C'est la condition de ceux qui viuent en delices & voluptés. A proprement parler ce sont corps viuans, que nous voyons , mais desquels les ames sont pourries par le peché. Afin que iamais il ne t'auiene d'estimer que tu ayes part aucune à l'exaltation du Fils de Dieu, si tu n'auances en la sanctification , combatant ton peché , renonçant au monde , aspirant au ciel où a esté esleué ton Sauueur, apres auoir surmonté toute son angosse.

Reste le derniet fruit de cette exaltation de Iesus Christ. Et c'est *nostre Glorification*. Benefice qui nous reuiet infaillible-

ment

ment de ce que Iesus Christ a esté enleué de la force de l'angoisse & de la condamnation. La raison y est toute euidente. Aussi y est toute l'Escripture, l'une & l'autre pour nostre singuliere consolation.

La raison est claire. Car puis que Iesus Christ nostre Chef a esté exalté, comment nous qui sommes ses membres demeure-rions nous en la mort, ou en l'ignominie de ce monde? Si tu vois la teste d'un corps hors de l'eau, tu presumes que les membres aussi en sortiront, & que desia ils sont hors de danger: Et nostre Chef est desia enleué de l'opprobre & angoisse de ce monde. Sans doute aussi donc approche la deliurance de ses membres, voire ils sont desia hors de danger. Qui plus est Christ est nostre Maître, & nous sommes ses seruiteurs. Voici donc ce qu'il nous dit au douzieme de S. Iean, Si quelcun me sert, qu'il me suiue: & là où ie serai, là aussi sera celui qui me sert: & si quelcun me sert, mon Pere l'honorera. Et la raison de cela est, pource qu'outre la qualité de seruiteurs, nous sommes aussi ses freres, les enfans de son Pere, ses amis, Cohe-ritiers que le Pere lui a donnez. Outreplus pourquoi l'Escripture l'appelle-elle le premier-né d'entre les morts? Sans doute pour nous asseurer que nous sortirós de la mort, & naistrons derechef apres lui en vie eter-

nelle. C'est à ce propos, que l'Apostre au fixieme des Hebreux dit que Christ est entré au ciel, comme auantcoursur pour nous. Ce mot d'auantcoursur emporte quant & soi vne raison excellente. Car comme Iean Baptiste est appelé precursur ou auantcoursur de Iesus Christ, pour monstrier que Iesus Christ venoit apres lui : Aussi puis que Iesus Christ est entré au ciel comme nostre precursur, c'est vn tesmoignage infailible que nous l'y suiurons au temps que Dieu par sa sagesse a determiné à vn chacun de nous.

Mais oyons ici parler l'Ecriture en termes formels. L'Apostre au quatrieme de la premiere aux Theſſaloniens : Si, dit-il, nous croyons que Iesus est mort, & est resuscité : pareillement aussi ceux qui dorment en Iesus, Dieu les ramenera avec lui. Le mesme Apostre nous enseigne clairement là dessus au quinzieme de la premiere aux Corinthiens: Si, dit-il, nous auons esperance en Christ en cette vie seulement, nous sommes les plus miserables de tous les hommes. Or maintenant Christ est resuscité des morts, & a esté fait les premices des dormans. Car depuis que la mort est par vn homme, aussi la resurrection des morts est par vn homme. Car comme en Adam tous meurent, pareillement aussi en

Christ tous sont viuifiez. Et au troisieme de l'Epistre aux Philippiens, Nostre conuersation est de bourgeois des cieux, dont aussi nous attendons le Sauueur, assauoir le Seigneur Iesus Christ, lequel transformera nostre corps vil, afin qu'il soit rendu conforme à son corps glorieux, selon cette efficace par laquelle il peut mesmes assuettir toutes choses à soi. Et voici la promesse du Seigneur au quatorzieme de saint Iean, Il y a plusieurs demeurances en la maison de mon Pere: s'il estoit autrement, ie vous l'eusse dit. Ie vous vai apprestier lieu: & quand ie m'en serai allé, & vous aurai préparé le lieu, ie retournerai derechef, & vous receurai à moi, afin que là où ie suis vous soyez aussi. Bref l'Apostre conclud de la resurrection du Seigneur à la nostre au sixieme de la premiere aux Corinthiens, Dieu a ressuscité le Seigneur, & nous ressuscitera aussi par sa puissance: voire l'Apostre, afin que nous ne doutions nullement de cette verité, nous en parle comme d'une chose presente & desia aduenue: quand il dit au deuxieme des Ephesiens, Dieu nous a ressuscités ensemble, & nous a fait seoir ensemble es lieux ecclestes en Iesus Christ. Nous y sommes desia en Christ, non seulement pource que desia le chef y est en effect. En effect aussi les ames bien heureuses: & par esperance les fi-

deles viuans au monde. Mais pource qu'au dernier iour reellement & de fait Christ nous receura avec foy en corps & en ame, afin que là où il est , là nous soyons avec lui eternellement.

Si donc il est ressuscité c'est aussi pour delivrer les douleurs de nostre mort & nous faire reuiure. S'il est monté au ciel , c'est apres nous auoir fermé la porte des enfers : c'est pour nous donner entree, place, demeurance au paradis celeste. S'il s'est assis à la dextre de son Pere , c'est pour acheuer de dompter tous nos ennemis, le dernier desquels c'est la mort. Et quand elle aura esté entiere-ment abolie , alors non seulement nous viurons, mais aussi nous regnerons avec Iesus Christ à iamais.

O fidele, pourrois tu bien dignement assez admirer l'excellence de ce benefice que nous apporte l'exaltatiō de nostre Sauueur? L'Apostre saint Pierre ravi par la contemplation de ce fruct dont la valeur surpasse tout entendement , s'escrie en ces mots au premier de sa premiere: Benit soit Dieu qui est le Pere de nostre Seigneur Iesus Christ, qui par sa grāde misericorde nous a regene-rez en esperance viue par la resurrection de Christ, d'entre les morts: pour obtenir l'heritage incorruptible qui ne se peut cōtaminer ni flestrir, conserué és cieux pour nous.

O quelle consolation, ou quand tu sens approcher l'heure de ta mort, ou lors que de ce monde il retire à soi tes plus intimes: la n'auiene qu'alors avec les infideles tu murmures contre Dieu: que tu te plains de ses actions: que tu accuses le destin: que tu tesmoignes ou du desespoir, ou de l'athéisme! la n'auiene aussi, que tu te contentes des consolations & cures palliatives, que la raison humaine met en auant: pour dire que rien ne doit suruenir que tu ne doiues desia auoir premedité: que ton affliction est le grand chemin de toute chair: qu'il n'y a nul remede: qu'il faut passer par là.

Mais en ta mort, ou en celle de tes proches, outre plusieurs consolations solides que nous fournit l'Escripture, voici aussi nostre texte qui t'apprendra à dire, Puis que de la force de l'angoisse Christ a esté enleué en sa gloire, pour nostre glorification, Console toi, ô fidele, Sçache, que si l'habitation terrestre de cette loge est destruite, nous auons vn edifice de par Dieu, assauoir vne maison eternelle és cieux qui n'est point faite de main: Sçache, que celui qui a ressuscité le Seigneur Iesus, nous ressuscitiera aussi par Iesus & nous fera comparoir en sa presence.

Ceste esperance là nous soustient. Pour

l'apprendre nous viuons : & nous mourons pour l'experimenter. Et cette mort donne aux corps leur repos en l'attente du dernier iour: est à nos ames vn enleuement de toute angoisse : vn passage de la misere à la felicité, tant qu'en corps & en ame celui qui s'estoit abbaissé & qui a esté exalté pour nous, nous exalte avec soi.

Nul ne peut sçauoir ces choses ; nul les sentir en vray fidele, qu'avec ioye il ne remette son ame és mains de l'Eternel son Dieu : ou qu'il ne reçoie vne singuliere consolation dans le dueil que lui cause le decés de ses plus proches.

Voila sommairement & en general les trois principaux fruiçts que nous apporte l'exaltation de nostre Seigneur Iesus Christ. Fruiçts, par lesquels on doit iuger de l'arbre & reconnoistre de quelle importance est le texte que nous auons exposé. Fruiçts auxquels nous ne doutons nullement que tout vray fidele ne desire participer avec affection.

Difons pour la fin, qu'en voici en vn mot le moyen & la certitude. De ces trois benefices, si tu es vray fidele, l'vn t'est desia communiqué, qui est la iustification. Le troisieme tu en conçois l'esperance: & c'est la glorification. Or comme le lien du temps passé & du temps à venir c'est le temps present:

Cestui ci est entre celui qui a esté & celui qui sera : Aussi sçache que ta iustification t'a esté dès le temps passé vrayement communiquée, & qu'au temps à venir la glorification ne te manquera point : si ta sanctification t'est tousiours présente. Cette ci procede infailliblement de la premiere, & precede necessairement la dernière.

Et pleust à Dieu que plusieurs gens parmi nous prissent bien garde à l'ordre de ces trois benefices. Clairement verroyent-ils que iusques à present ils ont eu tort & se sont abusez eux mesmes, & de se vanter de la iustification, & de se promettre la glorification, puis qu'ils combattent formellement le lien de ces deux benefices, qui est la Sanctification. Ceux que Dieu a iustifiez, ceux qu'il glorifiera, ce sont ceux qu'il sanctifie.

Arreste toi à ce point, autant que tu en as en toi de marques, autant que tu en donnes de vrayes preuues à tes prochains, autant dois tu estre assure & que Dieu t'a iustifié & qu'il te glorifiera.

Que sert donc auiourd'hui ou aux profanes, ou aux hypocrites toute leur vanterie? S'il faut discourir des graces qui nous reuiennent ou de l'aneantissement, ou de l'exaltation de Iesus Christ, Si de la iustice qui nous est gratuitement imputée : Si des pro-

messes excellentes dont à l'aduenir Dieu donnera aux siens pleine iouissance en la vie eternelle: En tel cas vous n'oubliez rien à dire. Plusieurs entre nous en parlent, comme s'ils n'auoyent iamais pensé à autre chose. Mais pourquoi laissent ils en arriere la sanctification? Et pourquoi démentent ils impudemment l'excellence de leur creance par l'impieté de leur vie? hélas! la Religion consiste, non en belles paroles, mais en bonnes actions : Non à auoir la langue plus grande que les mains: mais plus d'effect que de discours : Non à auoir simplement le sel d'une saine doctrine: mais aussi la lumiere d'une sainte vie: Non à faire admirer la subtilité de ton sçauoir, mais imiter la simplicité de tes actions.

D'autre costé te sera-il bien possible de me persuader, & que ta iustification est ratifiée en Dieu: & que ta glorification t'est reseruee au ciel? Mais quand i'entre chez toy, ie n'y trouue point la sanctification, fruit de la premiere, auantcoureur de la derniere. N'as tu point de honte de parler & de ce qui est en Dieu, & de ce qui est au ciel sans auoir soin de ce qui deuoit estre en toi mesme? Semblable en cela à certaines personnes qui se vantent d'auoir par le passé trouué de grands secrets, & qu'à l'aduenir ils esperent que l'or, que l'argent, ne leur man-

manquera point. Mais les considerant de pres, vous trouuerez qu'ils n'ont ni dequoi se vestir, ni dequoi se nourrir, qu'ils meurent gueux & miserables. Et ne leur eust-il pas beaucoup mieux valu mettre la main à quelque bõne vocation, pour gagner leur vie & soulager les pources? De mesme tu te vantes d'auoir bien exacte cognoissance des mysteres de l'Euangile : des secrets de ta iustification: qu'aussi les thresors de la glorification ne te peuvent manquer. Cependant, qu'on voye ton mesnage, ton equippage, c'est à dire ta vie, tes actions : on trouuera que ce n'est qu'ordure, que pauureté, que langueur. Tu te dis iustificié en Iesus Christ: & toi mesme tu n'es qu'iniquité, qu'iniustice. Tu te promets que Dieu te glorifiera : & tu n'apportes en son Eglise que scandale, qu'opprobre, qu'ignominie. Tu te promets de grâdes richesses ; & tu es rongé par la vermine de ton peché: Tu meurs de faim. & les membres de Christ souffrent la mesme incommodité par ton auarice. Ton ame est deschiée en pieces, & il ne tient point à toi que tes prochains ne le soyent aussi par tes querelles, animosités, diuisions, partialités. Tu esperes vn repos eternel : & tu serois bien marri d'auoir en ce monde donné vne seule heure de repos ou à ta conscience, ou à l'Eglise de Dieu. Tu aens d'estre là haut logé

en vn palais Royal, & tu es ici plongé iufqu'aux oreilles dans le borbier infect de tes sales conuouitifes, de tes propres diffolutions, de tes gestes impudiques, de ta volupté, de ta paillardife, de ta gourmandife, afin que nous ne difions pis.

Cesse donc ou de mal viure, ou bien de te vanter de la iustification, & de te promettre la glorification.

Encor ce mot, afin que tu fçaches que si tu ne penfes à toi, tu ne trompes que toi-mefme. Par le premier benefice, qui est la iustification nous obtenons le tiltre d'enfans de Dieu. Par le dernier qui est la glorification celui d'heritiers. Mais par la Sanctification nous fommes rendus fes feruiteurs. Chacun se peut vanter d'estre enfant de Dieu, & fon heritier: car ce font choses que nous pouuons sentir en nous mefmes, mais non voir en autrui. Et Dieu seul cognoift ceux qui font fiens. Mais de te qualifier feruiteur de Dieu, fans lui rendre aucun seruice & en viuant du tout selon ta volonté, du tout contre la frene; en cela ne nous pourras tu abuser, ni nous empescher de te dire que n'estant point encor sanctifié, comme nous ne pouuons pour le present croire ta iustification, aussi ne dois tu point efperer pour l'aduenir ta glorification.

C'est à vn chacun de nous de bien penser
à ces

à ces choses, de se les appliquer à soi mesme,
se souuenant qu'il ne doit rien esperer de
Dieu en la vie éternelle, s'il ne se sanctifie,
& consacre à lui dès la vie presente. S'il le
fait, qu'il prene sa sanctification desia com-
me vne premiere resurrection, & comme vn
acheminement infaillible à la seconde, sui-
uant ce qui est dit au vingtieme de l'Apo-
calypse; Bien heureux & sainct est celui qui
a part en la premiere resurrection: la secon-
de mort n'a point de puissance sur eux, ains
ils seront Sacrificateurs de Dieu & de
Christ: & regneront avec lui
mille ans.

*Dieu nous en face à tous la grace,
Amen.*

S 2

